

Siunnersuummut nassuiaatit

Nassuiaatit nalinginnaasut**1. Aallaqqaasiut**

Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisaat nr. 18, 8. juni 2017-imeersumik inatsimmi § 63, imm. 2 kommuninut ataatsimut akileraarummut procenti akileraarutissaq pillugu aalajangersagaq allangortinneqarpoq.

Inatsisip allangortinneqarnerani allassimavoq, kommuninut ataatsimut akileraarummut procenti akileraarutissaq Naalakkersuisunit aalajangerneqassasoq. Tamanna inatsisiliornikkut kukkuneruvoq, procentimi akileraarutissaq nunamut tamarmut akileraarummut procenti akileraarutissaq assigalugu Inatsisartunit aalajangerneqassammat.

2. Siunnersuutip imarisai pingaarnertit

Inatsisissatut siunnersuummik matuminnga aningaasarsianit akileraarutit pillugit Inatsisartut inatsisaanni naqqiisoqarpoq, taamaasilluni kommuninut ataatsimut akileraarummut procenti akileraarutaasussaq Inatsisartunit aalajangerneqassasoq allaqqalersillugu.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi Inatsisartut inatsisaatigut nr. 18, 8. juni 2017-imeersukkut kingullermik allangortinneqartumi, ima allanguisoqarpoq:
§ 63 <i>Imm. 2.</i> kommuninut ataatsimut akileraarummut procent akileraarutissaq Naalakkersuisunit, kommuninik tusarniaareernermi aalajangerneqassaaq qaammatsiutit malillugit ukioq akileraarutip atuutilerfissaa sioqqullugu ukiup affaani siullermi Inatsisartut ataatsimiinneranni.	1. § 63, <i>imm. 2.</i> , ima oqaasertalerneqassaaq: ” <i>Imm. 2.</i> Ukioq pineqartoq sioqqullugu ukiup affaani siullermi Inatsisartut ataatsimiinnerminni kommuninik tusarniaareernerup kingorna kommuninut ataatsimoortumik akileraarutip procentia aalajangertassavaat”
	§ 2 Inatsisartut inatsisaat 1. januar 2018-imi

3. Pisortanut aningaasaqarnikkut allaffissornikkullu sunniutissai

Inatsisissatut siunnersuut pisortanut aningaasaqarnikkut allaffissornikkullu sunniuteqassanngilaq.

4. Inuussutissarsiutinik ingerlataqartunut aningaasaqarnikkut allaffissornikkullu sunniutissai

Inatsisissatut siunnersuut inuussutissarsiutinik ingerlataqartunut aningaasaqarnikkut allaffissornikkullu sunniuteqassanngilaq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut, pinngortitamut imaluunniit inuit peqqissusaannut sunniuteqartussatut naatsorsuutigineqanngilaq.

6. Innuttaasunut sunniutissai

Inatsisissatut siunnersuut innuttaasunut sunniuteqassanngilaq.

7. Sunniutissat allat annertuut

Inatsisissatut siunnersuut allanik annertuunik sunniuteqassanngilaq.

8. Oqartussaasunik kattuffinnillu il.il. tusarniaaneq

Kukkunermik erseqqissumik aaqqiisoqarneruinnarmat siunnersuut tusarniaassutigineqarnikuunngilaq.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Siunnersuutigineqarpoq, oqaaseq ”Naalakkersuisut” ima allanngortinneqassasoq: ”Inatsisartut”.

§ 2-mut

Siunnersuutigineqarpoq, Inatsisartut inatsisaat 1. januar 2018-imi atortuulissasoq.